

علوم، اقتصادیه و اجتماعیه

مجموعه علم

هر آيت اورن بشجی کوفی نشر اولنور

مؤسسی:

احمد متیب، رضا توفیق، محمد جاوید

منبر مطالب:

تمتع و برکبی: فائق تزهت. — دول مقدمه تک سیاحت
مذهبه لری: احمد شعیب. — سلائیک. — مناسر دمیر یولی:
محمد جاوید. — تصنیف علوم. — بعضی مقدمات فلسفیه:
رضا توفیق. — تجارت بحریه و لیانلر: احمد مختار. —
فراشه اختلال کبیری: احمد شعیب. — نشریات و وقایع اقتصادیه:
محمد جاوید.

مدیر و صاحب امتیازی:

محمد جاوید

نسخه سی: ۱۰ غروش

استانبول

امور اداره و تحریریه: باب عالی جاده سنده ۵۵۵۵ مطبعه سی، نومبر ۶۶

مؤسسات نافعه

۲

سلانیک - مناستر و یولاری [۱]

روم ابلی دمیر یولاری واسطه سیله قوصوه ولایتک مرکزی اولان اسکوب شهر یله دوغرودن دوغرویه ، پای تخت ایله ده صربستان و بلغارستان طریقله التصاق ایدن سلانیک شهری اک یاقین بر قومشوسی اولان مناسترله اک بسیط وعادی وسائط نقلیه ایله ، حیوانلرله و آرابالرله ، مناسبتده بولخنده ایدی . حال بوکه بو ایکی شهر آراسنده غایت منبت اراضی موجود اولدینی کی سلانیک ، مناستر و حوالیسینک یکانه مخرجی واسکله سی اولوق حبسیله بولاری بر برینه ربط والتصاق ایتکده زراعت و تجارت نقطه نظرندن بیوک برفائده ملحوظ ایدی . ایکی مرکز ادارینک یکدیگرینه تقرب ایتمه سندن سیاست داخلیه جه حصوله کله جک منافعدن

[۱] 4 — Les finances de la Turquie, Morawitz.

2 — Statistique des principaux résultats de l'exploitation des chemins de fer de l'Empire Ottoman, Alexis Rey.

3 — Corps de droit Ottoman, vol. IV, Young.

4 — Manuel des Sociétés anonymes, Pech.

5 — Comptes rendus annuels de la Société du Chemin de fer Ottoman Salonique-Monastir 1894—1907.

6 — Rapport général sur la gestion des dîmes, agnams par le Conseil d'Administration de la Dette publique Ottomane.

ماعداء سلاویک — مناسرت خطک خارجى نقطه نظر دنده بر اهمیت مخصوصه سی واردی . یونان حدودینه وقوع بوله جق عسکر و مهمات نقلیاتی بوسایه ده تسهیل و تسریع ایدیلش اوله جقدی .

دده آغاج — سلاویک انتصاق خطی هنوز انشا ایدیله مش اولدیغدن هر نه قدر سلاویک مناسرت خطی اوچجی اردو مرکزینی برنجی و ایکجی اردولرله بلا و انطه مناسبتده بولوندورمیه جقسده دده آغاج و سلاویک اسکله لری بووظیفه واسطی ایفا ایدم بیلرلردی .

ایشته اداره ، عسکرک و اقتصاد نقطه نظر دندن فوایدی مسلم بولونان بو خطک امتیازی ۱۶ — ۲۸ تشرین اول ۱۸۹۰ « ۱۳۰۶ » تاریخلی فرمان ایله و ۹۹ سنه مدته دویجه بانق غروپی نامنه حرکت ایدن موسیو قانولایه اعطا ایدیلشدی .

•••

مقاوله نامه حکومت سنیه نامنه نافع و تجارت ناظری رائف پاشا ایله ، استوفاردده « وورتمبرغیشه فراین بانق » مدیری اولوب برلینده اجرای معامله ایدن دویجه بانق غروپی نامنه حرکت ایله ین موسیو قانولایه آراسنده عقد اولونمشدر .

قره فربه ، اغستوس ، وودینه قصبه لرندن ویا جوارلرندن کجه سی ، تسین ایدیله جک کذرکاهک ده حکومتیه قبول و تصویب اولونماسی مشروط اولان بوخط بری سلاویک — قره فربه ، دیکری قره فربه — مناسرت اولوق اوزره ایکی قسه آیریلشدی . قومانییه ، لااقل ۲۰ شرکیلو متروندن عبارت اولوق و برمووقفه منتهی بولونمق شرطیله هر شعبه یی اکمال ایتدکجه ایشله تمکک باشلامق حق و صلاحیتی اعطا ایدیلشدی .

شرکتک استملاک ایدم جکی اراضیدن بحث ایدن ماده مخصوصه ده

«سلانیک شهرنده موقف و تمانک انشاسی ایله بونلری کرکه، دکره ویا روم ایلی شندوفرینه ربط ایتمک اوزره شرکت اراضی اشترا ویا استیجار ایله مک ایچون دوغرودن دوغرویه خزینۀ خاصه نظارتیه مذاکرهیه» مأذون قیلغشدی .

۲۱۹ کیلو مترو ۲۰۰ مترو طولنده اولان بوخط ایچون سنوی کیلو مترو باشنه ۱۴۳۰۰ فرانق تأمینات ایچیهسی تعهد اولونمش و سلانیک مناستر سنجاقلری اعشاری قارشیلیق کوستریلمشدی .

مقاوله نامه نك ۱۷ نجی ماده سنده امتیازك تاریخ اعطاسندن اعتباراً اوتوز سنه مرور ایتدکن صوکر ا حکومتك هر نه زمان ارزو ایدر سه خطی اشترا ایده بیله چکی و بدل اشترا اوله رق، صاتین آله جفی سنه دن اولکی بش سنه نك حاصلات غیر صافیۀ وسطیه سنك . ۵/ سنه معادل بر مبالغ سنوی ویره چکی و فقط بومبلغك ده هیچ بر صورتله کیلو مترو باشنه ۱۰ بیک فرانقندن دون اولمایه جفی تصریح ایدیلشدر .

عموم خطك سنوی حاصلات غیر صافییه کیلو مترو باشنه ۱۵۰۰۰ فرانقی تجاوز ایتدیکی تقدیرده فضله نك بر ربی حکومت سنییه عائد اوله ققدر .

•••

اشبو امتیاز داخلنده بولونان خطك انشاسی، اداره سی، وایشله دیلمه سی مقصدیه دویمچه بانق بر آنونیم شرکت تشکیل ایدر ك نظامنامه اساسینی ۱۹ کانون ثانی ۱۸۹۱ تاریخنده حکومت تصدیق ایتدیرمشدر .

شرکتك سرماییه سی ۲۰,۰۰۰,۰۰۰ فرانقندن عبارت اولوب ۲۰ بیک تحویلات ممتازیه؛ ۲۰ بیک تحویلات عادیه نه منقسم و بونلرک هربری ۵۰۰ فرانق قیت اعتباریه نی حازدر. سرمایۀ ابتدائی نك هیئت عمومیه نك

قراریله نصف درجه سنده تزید ایدیه بیله جکی نظامنامه ده مندرجسه ده بوکا شیدی به قدر لزوم حس ایدیه مشدر . شرکتک مجلس اداره سی هیئت عمومی طرفدن منتخب ۵-۱۵ اعضادن مرکب اولوب استانبولده اجتماع ایدر . یالکزی ایلک مجلس اداره هیئت عمومی نك تصویبته تابع اولمقسنن اوج سنه مدته آتیده کی ذواتدن تشکیل اولمشدی :

رسومات مشاوری برترام افندی - برلنده دره سندنر بانق مدیری موسیو غوتمان - موسیو آلفرد قابوللا - استانبولده مدیر عمومی موسیو اوطوفون کولمان - رایخشتاغ اعضاسندن موسیو شرادر - دویچه بانق مدیری و رایخشتاغ اعضاسندن دو قور سینس .

شرکتک تمتعات صافیة سنویه سی شو صورتله تقسیم ایدیلیر :
اولاً تحویلات ممتازه نك بدلی تأدیه ایدیلان قسی ایچون ۵٪ فائض افزاز اولونور .

باقینک ۵٪ ی احتیاط سرمایه سنه ۵٪ ی متساویاً مجلس اداره اعضاسنه ؛
۱٪ تکرار فائض اوله رق تحویلات ممتازیه ؛ ۴٪ ده ینه فائض اوله رق تحویلات عادیه نك بدلی تأدیه ایدیلش اولان قسنه ویریلیر . باقیسی ده حصه تمتع اوله رق بلا تفریق عموم حصه سنداتی یننده تقسیم اولنور .
سلانیک - مناستر خطی اکال ایدیلوب ایشله دیلمکه باشلانجیه قدر تحویلات ممتازیه سنوی ۵٪ انشات فائضی ویریلک ولیکیداسیون وقوع بولدیقی تقدیرده ابتدا تحویلات ممتازه نك بدلی تأدیه ایدیلکده نظامنامه نك شرائطندیر .

شرکت «سلانیک» مناستر عثمانلی دمیرویولی شرکتی «عنوانی و عثمانلی تابصیتی حائرر . ۱۰,۰۰۰,۰۰۰ فرائق تحویلات ممتازه نك نصفی ، ۱۰,۰۰۰,۰۰۰ تحویلات عادیه نكده کذلک نصفی که جمعاً اون ملیون فرائق

تحصیل واستیفا ایدیشدر . بوندن ماعدا اخراجنه قرار ویرلش اولان
 ۳۰٪ فاضلی ۶۰ میلیونلق تحویلاتك ده ۳۲ میلیون ۱۸۹۳ سنه سی مارتنك
 ۴ نده برلنده اخراج اولونمیشدی ؛ ۲۸ میلیونلق ده ختام انشا آنده پارس
 و بروكسلده اخراج ایدلك اوزره حفظ ایدیش وبالا خره میدان تداوله
 چیقارلمیشدی .

دویجه بانقك ریاستی آلتنده تشكیل ایدن سندیه خطك
 انشاسی « سلانیک - مناستر شندوفر ی انشآت شركتی » نامی حائر
 اولوب مركز اداره سی « فرانقفورت سور لو ماین » ده بولونان برشركته
 تودیع ایلهدی .

خطك برنجی شعبه سی اولان سلانیک - وهرته قوب قسمی (۹۷ کیلومرو) «
 ۹ كانون اول ۱۸۹۲ ده ایشله دلكه باشلادی و ایشله تمه خصوصی موقه
 روم ایلی شندوفر قومپانیه سنه - مصارف حقیقیه سنه ضمیمه مصارف
 عمومیه نامیه ۱۵٪ ویریلك شرطیه - تودیع واحاله ایدلدی .
 خطك ، مقاوله نك تاریخ امضاسندن اعتباراً ایکی بوجوق سنه ظرفده
 انشاسی مقرر ایدیه ده اثنای عملیاتده تصادف اولونان مشکلاته ، تونلره
 کوپرولره ، مبنی برسنه ده اتمدید اولوندی .

شركت روم ایلی دمیر بول قومپانیه سیله اویوشه رق سلانیکه موقوف
 انشاسی كلفتندن قورتولدی و بو صورته بش یوز بیک فرائق راده سنده
 برتصرف ایتدی .

۱۸۹۴ سنه سی حزیرانك ۱۳ نده خط ختام بولوب سلانیک —
 مناستر آراسنده تره نلر منتظماً اشیا و بولجی نقله باشلادی .

°°

روم ایلی شندوفر قومپانیه سیله یاییلان مقاوله نامه ۱۹۰۰ سنه سی .

نهایتاً قدر مرعی ایدی . او وقتدن بری ده هر سنه بحقر ، طرفیندن بری
تفصیحی طلب ایتمدجه ، جاری الحکمدر .

مختلف سنه لره طائد ایشله تمه

مصارفی بروجہ آئیدر :

۱۸۹۳	کیلومترو باشنه	۳۱۲۳,۵۹	فرانق
»	»	۳۰۶۵,۷۳	»
»	»	۳۳۵۷,۶۱	»
»	»	۲۹۵۹,۸۸	»
»	»	۴۶۹۷,۶۰	» (بونان محاربه سی)
»	»	۳۲۲۹,۸۹	»
»	»	۳۲۱۸,۴۷	»
»	»	۳۰۸۶,۲۵	»
»	»	۲۸۸۷,۰۹	»
»	»	۳۲۱۷,۰۵	»
»	»	۳۱۴۷,۴۱	»
»	»	۳۳۰۸,۲۳	»
»	»	۳۴۹۱,۸۱	»
»	»	۳۴۲۹,۶۰	»
»	»	۴۳۴۷,۶۶	»

°°°

کیلومترو باشنه ۱۴۳۰۰ فرانق تأمینات ایچہ سی موجود اولدیغندن شرکت
هر سنه ۲۱۹ کیلومترو ایچون $۱۴۳۰۰ \times ۲۱۹ = ۳۱۳۱۷۰۰$ فرانق
تأمیناته کسب استحقاق ایدر . دمیر یولک اثنای انشاسنده قومپانیه
طرفندن اجرا ایدیلش اولان تدقیقات ، مناقلات تجاریه نك اوزمانکی
حاله نظراً بیله کیلومترو باشنه غیر صافی اوله رق سنوی ۸۰۰۰ فرانق
حاصلات تأمین ایلاهه جکنه دائر بر فکر وطن حصوله کتیر مشدی .
قومپانیا بو $۲۱۹ \times ۸۰۰۰ = ۱۷۵۲۰۰۰$ فرانقی مذکور ۳۱۳۱۷۰۰

خراتقدن تنزیل ایدنجیه باقی قالدیه ۱۳۷۹۷۰۰ فرانکی هر سنه دکلسه ده برمدت ایچون حکومتدن استیفا ایلدیه چکنی حساب ایدیوردی. سلانیک و مناستر سنجاقلرینک اوزمانکی اعشار مصلاتی ده بومقداری تسویه یه جلفاً مابلغ کفایت ایدردی .

سلانیک سنجاقی

سنه	لیرا	فرانک
۱۸۹۰	۸۹۵۷۱	۲۰۳۵۰۶۳
۱۸۹۱	۱۷۱۳۸۸	۳۹۴۱۹۲۴
۱۸۹۲	۱۶۷۴۴۳	۳۸۵۱۱۹۹

مناستر سنجاقی

۱۸۹۰	۸۱۴۷۶	۱۸۵۱۱۴۸
۱۸۹۱	۸۷۳۸۳	۲۰۰۹۸۳۰
۱۸۹۲	۱۰۸۶۵۵	۲۴۹۹۰۶۵

بناءً علیه تحصیلی دیون عمومیه مودوع اولان ب. تأمینات قوی بر تأمینات ایدی .

*
*

خطک برنجی قسمنک (سلانیک - وهرته قوب) ایشله دملکه باشلادی
(۹۶ ک ۷۵۰ م) ۹ کانون اول ۱۸۹۲ تاریخندن اوز سنه نك ختامه قدر ۶۷، ۲۳۴ ۵۴ فرانک حاصلات غیرصافیسی اولمش، حکومتدن ده تأمینات اوله رق ۲۸۰۸،۳۸ لیرا آلمشدر . تام بر سنه اولان ۱۸۹۳ سنه سی ظرفده ایسه حاصلات غیرصافیسی ۴۴۹۵۸۱ فرانقه بالغ اولمش، حکومتده تأمینات اوله رق ۴۰،۹۶۳ لیرا ویرمشدر .

۱۸۹۴ سنه سنک بر نصفده خطک یالکز بر قسیمی، حز براندن صکره کی

نصفنوده تمامی ایشله دیلوب حاصلات غیر صافیه ۱,۰۱۲,۰۴۰ فرانق،
تأمینات اچیه سی ده ۱,۳۱۱,۲۱۸ فرانق اولمشدر .

۱۸۹۵ سنه سنه قدر کچن بو سنه لر مقایسه یه تماماً صالح اوله بیله جک
سنه لر دکلدر . ۱۸۹۵ دن اعتباراً خطک حاصلات غیر صافیه سیله تأمینات
اچیلرنده ناصیل بر تحول وقوع بولدیفنه باقالم :

۱۸۹۴ سنه سی ظرفده ایشله دیلن خطک وسطی طولی اولان ۱۶۵
کیلو مترویه نظراً کیلو مترو باشه حاصلات غیر صافیه ۶۱۳۳ فرانق ایکن
۱۸۹۵ ده بو حاصلات، عموم خط اوزرندن کیلو مترو باشه ۶۳۱۴ فرانقه
حاصلات غیر صافیه یکونی ده ۱,۳۸۲,۹۶۰ فرانقه بالغ اولمشدر .
تأمینات اوله رق ویریان مبلغ ده ۱,۷۴۲,۵۰۰ فرانقدر .

سنه لر	حاصلات غیر صافیه	تأمینات اچیه سی
۱۸۹۵	۱۳۸۲۹۶۰	۱۷۴۲۵۰۰
۱۸۹۶	۱۴۰۲۳۱۴	۱۷۳۰۰۷۹
۱۸۹۷	۲۶۰۶۳۱۷	۵۱۶۵۹۴
۱۸۹۸	۱۹۷۲۱۲۸	۱۱۵۸۲۵۷
۱۸۹۹	۱۴۶۹۶۹۸	۱۶۵۷۷۳۳
۱۹۰۰	۱۵۱۰۴۹۷	۱۶۱۰۳۰۳
۱۹۰۱	۱۴۳۳۰۷۰	۱۵۹۴۴۳۲
۱۹۰۲	۱۵۸۶۴۶۶	۱۵۳۲۴۱۴
۱۹۰۳	۱۸۴۲۰۲۲	۱۲۷۰۸۷۵
۱۹۰۴	۴۰۳۴۴۶۸	۱۰۷۷۸۸۳
۱۹۰۵	۲۰۶۸۰۷۳	۱۰۴۲۰۵۴
۱۹۰۶	۲۶۷۱۰۸۱	۴۳۴۷۱۳
۱۹۰۷	۲۷۳۳۲۹۹	۳۷۱۱۹۴

۱۸۹۵ ده محصولات زراعیه فیاتلرینک تدبیری اخراجاته بر مانع
قوی تشکیل ایله مکهله برابر حاصلات وسطیه ۱۸۹۴ ککندن فضله

اولمشدر . ۱۸۹۵ ك نصف اولنده ينه عینی حال دوام ایتمشهده نصف
اخیرنده فیاتلر یوکسهلمش ، اخراجات آرتمش وقومپانیه غائب ایتدیکنی
قازانمشدر . نقلیاتی صرف محصولات زراعیهدن عبارت اولان مملکتلرده
وسائط نقلیه دائماً احوال طبیعیهك وییاسهك تحت تأثیرنده قالمغه محکوم
کبدر .

۹۶ و ۹۷ سنلری آراسنده بردن بره بویوک برفرق مشاهده ایدیللمسی
تقلیات عسکریه اجراسندن ناشیدر . حاصلاتك ۴۶٪ سی اولان تقلیات
عسکریه بدلاتی تنزیل ایدیلدیکی تقدیردهده ينه سکز اون بیک فرائق بر
فضله حاصلات کورولورکه اشیا وامتنه تقلیاتك قسماً تحدیدینه ، بعض
تره نلرك الفاسنه مجبوریت حس ایدیلش اولدینی برسنه ایچون بالطبع
شایان ممنونیتدر .

۱۸۹۸ حاصلاتك بر قسمی ده مملکتلرینه عودت ایدهن عسكرك بدلات
نقلیهسی یعنی برفوق العاده وارداتدر .

۱۸۹۹ سنهسی ينه حال طبیعییه عودت ایتش بر سنهدر . ۱۸۹۸
سنهسی حاصلاتندن عسکر نقلیاتی تنزیل ایدیلدکدن صوکر اباقی قالان
مقدارایله بومقدار آراسنده جزئی برفرق وارکه اوده داخلهکی استوق
مالک محاربه مناسبتیه کاملاً صرف اولونوب اخراجات ایچون بر شی
قالامسندن وبرکت اولقله برابر حصاء زماننده یاغمور یاغورق محصولاتك
یوزولماسی حسیله خارجهده مشتری بولاماسندن ناشیدر .

۱۹۰۰ ، ۱۹۰۱ سنهلرنده حاصلات غیر صافیهدده خفیف بر تراید
وقوع بولمشدر . ۱۹۰۲ سنهسنده تراید دها بر پارچه آرتمشدر .

بوحوالینك اك مهم اخراجاتی اولان مصر محصولك قوراقلق
دولایسیله آزالماسی وروم ایل ولایاتنده اغتشاشات داخلیه ظهور ایدهرک

معاملات تجاریه به خلل کله سی کی محاذیر موجود اولما-هیدی حاصلاتک دها زیاده آرتما سی ممکن اولایسهلجکی طبعیدر . ۱۹۰۳ سنه سنده حاصلات غیر صافیونک آرتدنی کورولویور . بوده حادثات سیاسیة دولایسهله اجرا ایدیلن نقلیات عسکریه دن ناشیدر . اخراجات ، بالخاصه حیویات اخراجانی کچن سنه محصولک آزانندن و داخلده کی صرفیادن ناشی آزانمشدر . ۱۹۰۳ محصولک مصردن ماعداسی ای اولمشدر .

۱۹۰۴ ده حاصلات غیر صافیونک تکرار تزیاد ایتدیکنی کورویوروز . حیویات حاصلاتی مبذول اولمش ، مستهلک پیاسه لردن طلب زیاده لشمش ، سکون و آسایشک بدرجه به قدر اعاده سی واستقراری حسیله عملیات زراعیه بالنسبه فضله اجرا ایدیش و بواسیابدن دولای حیویات اخراجانی سنه سابقه دن ۵۰٪ فضله اولمشدر . مصر محصولی بوسنده فنا کیتشددر .

۱۹۰۵ ده ۱۹۰۴ — ۱۹۰۵ سنه سی قیش موسمنک غایت شدتلی اولماسنک مزروعاته ایقاع ایتدیکی ضرره رغماً حاصلات غیر صافیده بر تزیاد وقوع بولمشدر . ۱۹۰۶ ده آلتی یوزبیک فرانق قدر فضله حاصلات کورولویورسده بونک ۶۶۸,۲۷۰ فراننی دیگر سنه لده اجرا ایدیش اولان نقلیات عسکریه دن دولای حکومتک مدیون اولدینی مبالغک بوسنه ظرفنده تحصیل ایدیله سندن نشأت ایله مشدر . مع مافیة بوتزیل ایدیلدیکی تقدیرده دخی ۴۰۰ بیک فرانق قدر بر تزیاد واردر .

۱۹۰۸ سنه سنده ایسه حکومت تأمینات آچقه سی اعطاسندن قورتولمشدر

خطات بدایت انشاسدن ۱۸۹۷ سنه سنه قدر كرك يولجى كرك اشيا
تقليتسده وقوع بولان تجولاته كلنجه :

اشيا نقلياتى طونيلاتو	اشخاص نقلياتى عدد	سنه
۲۱۸۴۷	۴۳۵۵۵	۱۸۹۳
۳۴۷۲۴	۶۲۶۶۲	۱۸۹۴
۴۷۵۲۰	۸۲۱۲۵	۱۸۹۵
۵۱۸۶۶	۹۱۱۹۷	۱۸۹۶
{ يونان محاربه سى ۱۲۱۹۶۷	۲۴۲۹۲۳	۱۸۹۷
۷۳۹۸۹	۱۳۵۴۸۰	۱۸۹۸
۵۷۶۰۵	۹۶۲۱۰	۱۸۹۹
۶۳۳۶۹	۱۱۲۳۰۹	۱۹۰۰
۶۳۱۴۸	۱۱۲۳۰۶	۱۹۰۱
۶۸۰۲۸	۱۲۱۳۲۸	۱۹۰۲
۷۵۱۱۷	۱۸۳۶۲۳	۱۹۰۳
۸۷۴۸۲	۱۵۲۱۸۹	۱۹۰۴
۸۴۶۷۰	۱۶۱۳۹۳	۱۹۰۵
۹۱۳۱۷	۲۱۶۷۷۹	۱۹۰۶
۱۰۳۹۸۴	۲۰۷۸۲۱	۱۹۰۷

كورولويوركه كرك يولجى لرك مقدارنده ، كرك اشيا تقليتسده منتظم بر
ترايد واردره برنجى سنده اشخاص و باغاز نقلياتى حاصلاتى ، حاصلات
عموميه نك يوزده ۴۷,۹۶۶ سنى ، اشيا نقلياتى حاصلاتى ايسه ۵۱,۶۰۰ نى تشكيل
ايدسيوردى. اك زياده نقل اولنان اشيا ده حبوبات ۸۴,۶۱۱ طون ، كور ۲۰۷۵۰ ،
كرسته ۱۰,۹۹۰ ، شراب ۱۰,۷۰۰ دى. ۱۸۹۴ سنه سنده حاصلات نك ۴۸,۳ دى
اشخاص و باغاز دن ، ۵۱,۷ سى اشيا دن آلمشدى. حبوبات ، كور ، كره
نقلياتى آرتمش ، پترول ، اون ، معادن مختلفه ، طوزه ، شكر ، بهارات نقلياتى
بر سنه اول ۳۰۰ — ۸۰۰ طونو آراسنده كوستر بل كده ايكن هربرى
۱۰۰۰ ي تجاوز ايتمشدر .

۱۸۹۵ ده اشخاص و باغاژ نقلياتى يوزده ۴۲,۰۲ اشيا نقلياتى ۵۷,۸۲ نسبتنده اولوب اشياى معموله ، يمش و پرنچده بىكر طونىلا تولىق نقليات سلسله سنه التحاق ايله مشدر. ۹۴ و ۹۵ سنه لرى بر بجران تجارى ايله مترافى اولدني حاليده اخراجات و ادخالات اشيا سنك آرتما سنده بعض نوع اشيا و امتعه ايچون قبول اولسان خصوصى تعرفه لك تاثيراتى مشاهده ايديلمشدر .

۱۸۹۶ ده اشخاص و باغاژ نسبتى ۴۱,۶۰ ، اشيا نسبتى ۵۸,۳۰ دى .
 ۱۸۹۷ ده نقليات عسكريه حاصلات عموميه نك يوزده ۴۵,۷۵ نى ، اشخاص و باغاژ نقلياتى ۱۸,۷۶ سنى ، اشيا نقلياتى ده ۳۵,۴۱ نى تشكيل ايتمشدى . بو سنه بالطبع مقايسه عموميه اجرا سنه يك صالح دكلدر .
 ۱۸۹۸ ده كنداك نقليات عسكريه حاصلات عموميه نك يوزده (۲۳,۹۹) نى ، يولجى و باغاژ نقلياتى (۲۹,۵۲) سى ، امتعا و اشيا نقلياتى ده (۴۶,۳۹) نى نسبتنده ايدى .

۱۸۹۹ سنه سندن اعتباراً اورمان حاصلاتى نقلياتى تزييد و توسيع ايچون ده ا معتدل بر تعرفه قبول و تطبيق اولونمقه باشلامشدر . بوسنه ظرفنده حاصلات عموميه نك يوزده (۳۷,۸۱) نى اشخاص و باغاژ نقلياتندن ، (۶۲,۰۳) نى اشيا و امتعه دن آتمشدر . ۱۸۹۹ نموزندن اعتباراً اشخاص نقلياتى ايچون قبول اولونان يكي تعرفه يولجى لرك مقدار نى سنه سى ظرفنده بيله آرتد رمشدر .

۱۹۰۰ ده يولجى و اشيا نقلياتى مهم بر تزييده اوغزامشدر . حاصلات عموميه به نظر ا بر نجيسى « ۳۵,۲۲ » ، ايكنجيسى « ۶۴,۶۱ » نسبتنده در .
 ۱۹۰۱ سنه سى همان عيى نسبتى محافظه ايله مشدر .

۱۹۰۲ سنه سنده يولجى نقلياتى آرتد نى كى اشيا نقلياتى ده آرتمش

نسبت « ۳۷،۰۴ »، « ۶۲،۸۵ » راده سنده بولونمشدر . بوسنه ایچنده
 حبوبات تجارتی پك فعال بر حالده ایدی . فیاتار دوشكون اولمقله برابر
 زراع بر ایکی سنه دوام ایدن برکتسزلك دولایسیله ایلک محصوللری
 اوجوز فیات ایله الدن چیقارمغه راضی اولمشدر . یمیش محصولاتی ده
 - اوزومدن ماعداسی - فنا کیتمشدر . اودون وکور نقلیاتی، هوانك
 فوق العاده ملایمتی صرفیات واستهلاکاتی تنقیص ایتدیکی جهتله، آزمیشدر.
 دیگر طرفدن اورمانلرده، تماماً اجرا اولونان قطعیات مواقفه یاقین یرلرده
 آغاچ بر اقامدیغندن کیتدکجه دها اوزاقلردن اشجار قطع ایتک هجوریتی
 حس ایدیلک باشلامش، اودون وکورلری اوزالردن مواقفه نقل ایچون
 فضله مصارف اختیار ایله مک لزومی صایتی اشکال ایله، مشدر .

۱۹۰۳ ده اشخاص وباغاز نقلیاتی « ۴۰،۸۳ »، اشیا نقلیاتی « ۵۹،۱۰ »
 نسبتده ایدی . بوسنه نك كرك اشخاص كرك اشیا نقلیاتنده نقلیات عسکریه ده
 داخلدر . اشیا وامتعه نقلیاتنك عسكرك اطمانه مخصوص قسمی ایله ینه
 بومیدن ناشی کومور نقلیاتی تزايد ایتمش، اوزوم نقلیاتی ده کچن سنه نك
 همان ضعفنی بولمش ایسه ده دیگر ادخالات و اخراجات اشیا سنده، مملکتك احوال
 عمومیه سی اعتباریله، حس ایدیله چك درجه ده بر تناقص کورولمشدر .

۱۹۰۴ ده اشخاص وباغاز نسبتی « ۳۴،۸۴ »، اشیا وامتعه نسبتی « ۶۵،۰۸ » در .
 اشخاص نقلیاتنك سنه سابقه دن آز کورولمه نك سببی عسکر ویره سی به نقل
 اولونیدی جهتله یونارك بدلالت نقلیه سی حسابا اذخال ایدیله مسیدر . اشیا
 عسکریه حئنده عین حال وارددر . بوسنه طرفنده مزروعاتك اینی اولماسی
 و فیاتار ك ترقی حسیله حبوبات، قیشك ندتی دولایسیله اودون و کومور،
 یونانسانده یکیشهر - پیره شندوفرینك انشامی سببیه قره طریقیله کیدن
 کرسته و دیمیر، فیاتار ك اوجوزلامسندن ناشی پترول، قره فیه ده یکی

فابریقه‌لر آجیل‌لاری حسیله پاموق نقلیاتی آرتمش، عسکرک چکیلیسی اون و برنج نقلیاتی، قرمز یو برلرک حکو مجه اثنای اخراج‌ده برمعاینه کیویه به تابع طوتوله رق حیللرک منعه چالیشیلماسی ده اشبو محصولک استحصالی و نقلیاتی آراشمدر.

۱۹۰۵ سنه سنده یولجی وباغاز نسبتی «۳۵,۹۷» اشیا و امتعه نسبتی «۶۳,۹۴» در. اوزوم محصولک ایلیکی شراب نقلیاتی، قره فریه وودینه، اغستوس فابریقه‌لرینک کیتدکجه توسع ایتهلری مواد معموله و پاموق نقلیاتی، حبوباتدن ماعدا مزروعاک ایلیکی بونلره متعلق نقلیاتی، یکی اورمانلرک ایشله‌لرک باشلامسی اودون نقلیاتی، تسالیاده قوراقلق حکمفرما اولمسی ده اورایه اخراج اولمق اوزره اون وصامان نقلیاتی تربید ایله مشدر.

۱۹۰۶ ده یولجی وباغاز نسبتی «۴۰,۸۸» اشیا و امتعه نسبتی «۵۹» دی. ۱۹۰۷ ده اشخاص وباغاز «۳۶,۳۸» اشیا ده «۶۳,۵۰» نسبتده بولونویوردی.

۱۸۹۴ سنه سنلی نقطه عزیمت اوله رق آلیرسه ق نقطه منته اولان ۱۹۰۷ سنه سنه قدر کچن مدت ظرفده اشخاص نقلیاتندن آلتان حاصلاتک حاصلات عمومیه به نسبتی یوزده «۴۸,۳» دن «۳۶,۳۸» نزل ایتدیکنی، اشیا و امتعه نقلیاتندن آلتان حاصلاتک حاصلات عمومیه به نسبتکده «۵۱,۷» دن «۶۳,۵۰» چیقدیغنی کوروروز.

بوده غایت طبیعی برشیدر. یولجیلرک تأمین اینده چکی منفعت خطک بدایت انشاسنده بالنسبه فضله اولاییلرسده سنهلر کچوبده خط، تولیدینه مستعد اولدیغنی منافعی وجوده کتیردکجه بو نسبتک اشیا و امتعه منفعتده اوله رق دیکشه چکی طبعیدر.

۱۸۹۴ سنه سنده نقل ایندیلهن باشلیجه اشیا و امتعه ایله ۱۹۰۷ سنه سنده

نقل ایدیلین باشلیجه اشیا و امتعە نك و زئیرینه باقار سهق نقلیاتده کی تزیایدك
بالخاصه هانکی اشیا به شامل اولدیغنی آکلایه جئمیز کی ادخالات و اخراجات
اشیاسنه دأرده برفكر پیدا ایتیش اولورز .

۱۹۰۷	۱۸۹۴	
۱۷۷۱۷	۹۴۱۹	حبوبات
۶۵۵۸	۳۱۰۶	كمور
۲۹۷۳	۲۲۷۴	كر استه
۱۶۹۵	۵۹۷	شراب
۳۷۴۰	۱۵۷۹	پترول
۷۹۷۴	۱۰۰۲	اون
۱۴۶	۱۳۰۹	معدن
۶۶۵۶	۱۷۰۷	طوز
۵۴۸۳	۱۵۶۴	شكر
۱۷۲۱	۹۶۱	پرنج
۴۵۵۱	۸۸۶	اشیای معموله
۳۰۵۷	۶۴۶	پاموق
۶۲۳۷	۱۱۳۳	بهارات
۱۲۶۶	۳۲۰	اوت و صمان
۲۲۲۴	۴۰۲	خام دمیر و خردوات
۱۴۳۹	۷۲۱	صابون
۵۷۶	۵۶۶	خام دری
۵۲۰	۱۴۸	معدن كموری
۱۸۵۳	۷۳۸	یش
۲۳۰۸	۸۶	كرچ، چنتو
۷۷۵	۶۴	حبوبات زیتیه
۶۲۹۸	۱۱	اودون
۸۵۸	۱۰۴	تازه سبزه و صوغان
۵۴۸	۱۳۱	باقی، ات و طیور املیه
۱۵۵۵	۲۷	قانون
۱۱۹۰	۱۰۳	اسیرتو و مسكرات
۲۳۹۰	۲۳۹	كیرد مید، طوغله

بواشيانڪ برقي اڌخالات برقي ده اخراجات اشيا سڍر . اوروپا
پياسه لڙندڙن ڪلھن اشياڻي شندوفر سايه سندن دها سهيل ودها اھون اولھرق
تدارڪ امڪاني استحصال ايد بلجھ اھالي بالطبع اشياڻي مذڪوره ي دھازيائھ
صرف واسٽھلاك ايتھڪ باشلامشدر . دمير يولنڪ انشاسي زراعي تزييد
استحصالاته سوق ايلھ مش ، حاصلات زراعيھنڪ تزييد و اورمانلرڪ
ايشلھ ديلھسي نقلياتي ده آرتير مشدر . بوضورتھ شندوفر ڪرڪ تجارت داخليه
وخارجيه اوزرنده ، ڪرڪ زراعت اوزرنده آڙجوق برتائير اجرا ايلھ مشدر .
حقق بوتاثيرات صنايعده دخي بر درجھيه قدر مشھود اولمشدر . قره فريھ ،
وودينه واغستوس قصبه لڙنده هيچ برقائده توليد ايتھڪ سڙين آقوب ڪيدھن
صولدن بو سايه ده استفادھ اولونمغھ باشلامش وصو ايلھ متحرك فابريقه ل
آچمشدر . بو فابريقه لڙھم مواد ابتدائيه لڙينڪ اڌخالي ، هم اشياڻي
معمولھ لڙينڪ اخراجي صورتيلھ شندوفر دن استفادھ ايتھڪھ درلر .

•••

شرڪنڪ ممتاز وعادي تحويلاتنڪ بدلي ۲۰ ميلين فراق يا خود ۸۸۰
بيڪ ليرا اولوب بونڪ ۴۴۰ بيڪ ليراسي تاديھ ايدلشدر . فقط بو حصھ
سنداتي ميدان تداولھ چيقاريلامش ، هيچ بربورسھيه قيد ايديلھ مشدر . شرق
شندوفر لڙي باقھسي [۲۰] بيڪ تحويلات ممتازھنڪ ۱۹۲۹۰ نه ؛ ۲۰ بيڪ
تحويلات عاديھنڪ ۱۹۲۷۰ نه مالڪ بولونمقدھ در . اشبو باقھ واسطھ سنيلھ
بوخط ڪاملاً آلمانلرڪ النده عدايديلھ بيلير . ذاتاً مجلس ادارسي آلمانلردن
مرڪب اولدين ي ڪي مجلس ادارھ دھله ڪھسي ده موسيو هو ڪئندر . خطڪ انشاسي
ايچون مقتضي سرمايه ي ، يوقاريدھ سويلھ ديكم ڪي ، اوبليغاسيون اخراجيلھ
تدارڪ ايلھ مشلردر . بهري ۵۰۰ فراق قيمت اعتباريه ايلھ ميدان تداولھ
[۵] علوم اقتصاديه واجتماعيه مجموعھسي : ۱. نومرو ، روم ايلي دمير بوللري صحيفه : ۷۲

چهاریلان ۱۲۰ بیک اوبلیغاسیونه هر سینه ۳٪ فائض ویریلکده در .
 بوکونه قدر ۳۸۲۶ اوبلیغاسیون اطفا ایدیلشدر . تحویلاتک پیاده کی
 قیترلنده بدایت اخراجلرندن بری وقوع بولان تحویلات بوجه آتیدر :

۱۸۹۳	نهایتده	۵۶,۱۰
۱۸۹۴	»	۶۱,۱۰
۱۸۹۵	»	۵۳,۲۰
۱۸۹۶	»	۵۳
۱۸۹۷	»	۵۷,۷۰
۱۸۹۸	»	۵۸,۹۰
۱۸۹۹	»	۵۶,۶۰
۱۹۰۰	»	۵۷
۱۹۰۱	نهایتده	۵۶,۶۰
۱۹۰۲	»	۶۴,۲۰
۱۹۰۳	»	۶۳
۱۹۰۴	»	۶۲,۷۰
۱۹۰۵	»	۶۴,۲۰
۱۹۰۶	»	۶۵,۷۵
۱۹۰۷	»	۶۲,۵۰

قیمت اعتباریه اوزرندن ۳٪ اولان فائض قیمت رایجه اوزرندن

$$۴,۸۰ = \frac{۲۰۰}{۶۳,۵۰} = \frac{۲ \times ۱۰۰}{۶۳,۵۰}$$
 دیمکدر .

شرکت حاصلات صافیه سبله بوفائضلری نادیه ایندکدن باشقه تحویلات
 ممتازنک ۵٪ فائضلری ده منتظماً تسویه ایله مشدر . تحویلات ممتازه وعادیه
 عینی اللرده بولوندیقندن متساویاً بوزده ۲,۵۰ فائض آلمشدر دیمکدر .
 بوکونه قدر مجلس اداره انضالرینک منفعت سنویه لری حصه دارانککندن فضله
 اولمشدر . فقط استقبلاً حصه دارلر انتظارلرینک مقابلی آلاجهلدر در . حکومتک
 بوسنه تأمینات اچقه سی اوله رق برشی ویرمک مجبوریتنده بولونمادیقی سویله مشدم .
 بوحال دوام و ترقی ایدمک فرض ایدرسهک ۱۴۳۰۰ فرانقدن فضله
 اوله حق حاصلات غیر صافیه نک ۲۵٪ ی حکومته ۷۵٪ ی قومپانییه
 عائد اوله جغندن حکومتک خطی اشترا ایدمک زمانه ، یاخود مدت
 امتیازییه نک ختامه قدر شرکتک حاصلاتی - مصارف استحصالیه سنده
 مهم برتراید وقوع بولمقسزین - دائماً آرته جقدر . اوزمان تحویلات ممتازه
 وعادیه فائضلرینی آله جقلری کی حصه تمنع دخی آلا بیله جکلردر . عجبا

بو خطك استقبال اقتصاديسی وارمیدر ؟

بو سوآله بلا تردد جواب تصدیق ویره بیایرز . بزه بوجوایی

ویردیره جك جدی سیلر واردر :

اولاً . — خطك گذرگاهنده امنیت و آسایشك صورت قطعیده
تأسیسی استحصالات زراعی و بونك نتیجهسی اوله رق نقلیات اوزرنده مهم
بر تأثیر حصوله کثیره جکدر . بوکونه قدر ایشله دیلمه یین اراضینك بوسایه ده
ایشله دیلمه سی ممکن اوله جقدر .

ثانیاً . — موافقدن ایجریلره دوغرو منتظم شوسه لر کشادی ،
طغیانلرك منع وقوعی ایچون یاییله جق عملیات ، برچوق اراضینك صو
آلتدن قور تولماسی ده عینی نتایجی تولید ایده بیله جکدر .

ثالثاً . — زراعتك ، شمدوفر موقفی اولان بعض چفتلكلرده
كورولدیگی اوزره ، كیندكجه دهافی بر شكل اكتساب ائمه سی ده عینی
نتیجه یی موجب اوله جقدر .

رابعاً . — صوجریانلری مبذول اولان یرلرده قوای میاهیهدن
استفاده ایدیله رك حیات صناعیه وسعت وکشایش ویریله سی ده كرك
ادخالات ، كرك اخراجات نقلیاتی آرتدیرمغه واسطه اوله جقدر .

فابریقه تأسیسی ، آنونیم شركت تشكیلی خصوصنده كوستریله جك
سهمولتلك دمیر یولی اوزرنده ده تأثیرات حسنه سی كوزوله جكننده شبهه
یوقدر .

خامساً . — مرور تذکره لرینك الغامی وصفیه اتخاذه صالح
محالرده امنیتك تأسیسیله برابر بعض تشبثات عمرانیده بولونولماسی یوجیلرك
مقدارینی ده بك زیاده آرتدیره بیله جکدر .

سادساً . — دها مهم بر تأثیر اجرا ایده جك اولان بعض اجراءات

وارد کرده بونلرده انشاسی متصور بولنان و ایر کچ یایله جق اولان خطوط حدیده دره. نافعہ نظارتک مجلس مبعوثانہ تقدیم ایستیک لایحه وخریطه لره نظر آ سلائیک - مناسر خطک ایکنجی موقی اولان کیدا استاسیونندن یونان حدودنده ، ساحله موازی اوله رق ، بلاتامونا موقعه (قترین دن کچرک) کیتک اوزره بر ، ینه عین خطک قره فریه موقفندن باشلایوب تا کسریه دن و کوریجه یاقینلرندن کچهرک دراجه کیتک اوزره دیگر بر ، و بویکی خطک ترابهزیکا موقفندن آریله رق ناسلیج ، یانیسه و سراندوزه منتهی اولق اوزره بر اوچجی ، مناسرتدن پرله یه قدر بر دردنجی خط ایله بر طاقم کوچوک شعبه لر انشاسی تصور اولغنده در . بو خطوط و شعبات انشا اولوندینی تقدیرده بونلرک سلائیکله و مناسرله واسطه ارتباط و التصاقی سلائیک - مناسر خطی اوله جقندن بو خطک سنه دن سنیه حاصلاتی مهم ، یک مهم بر نسیبتمه آرتیجغنده تردد ایدیلهمز. فی الحقیقه اشبو خطوط و شعباتک قسم اعظمی تأمیناتسز اجرا ایدیلهمیه جکی جهتله - بونلرک هانکیسنک اقتصاد، عسکرک نقطه نظرندن ضروری ویا مفید اولدیغنی شیمدیلک بر طرف ایدیورم - دولتک احوال حاضره مالیه سنک بونلرک تماماً انشاسنه مساعد اولهمیه جتی طبعیدر . فقط یانیه و دراج ایله مناسر و سلائیک التصاقی روم ایلیده وقوع بوله جق ایلك اثباتات مهمه انشایه میاننده تعداد ایدیلهمیلیر .

ایشته بوسیلردن دولایی مناسر خطی ماضی بی تلافی ایدهلک بر استقباله مالک صایله بیلیر . حکومت شیمدی به قدر ویردیکی تأمینات اچهلرینی حاصلات غیر صافیه دهکی حصه ربعیه سیله استیفا ایده جکی کبی آقسونلرکده فائض آلمایان قسمی فائض آلمغه باشلایه جق وهیسی ده حصه تمتع آلاسیله جکدر . امتیازک ۳۰ نجی سنه سنک ختامی اولان ۱۹۲۱

سنه سنه قدر کیلو مترو باشنه حاصلات غیر صافیه نك ۲۰ - ۲۵ بیک فرانقه بالغ اوله جنی صورت قویه ده مأمولدر . اوزمان حکومت سنوی کیلو مترو باشنه ۱۰ بیک فرانقدن دون اولماق اوزره صولك بش سنه لك حاصلات غیر صافیه نك وسطیسندن عبارت بر تقسیط سنوی اعطاسی مجبوریتیه خطی اشترا ایده بیله جکدر . بوصورتیه قومپایا بر طرفدن آلات وادوات ومواد متحرکه سنك اهل خبره معرفتیه تعیین وتقدیر ایدیه جك اولان قیمتی حکومتدن آلهرق بونی موجود مختلف احتیاط سرمایه لریله برلشدیره جك وانتخاب ایده جکی بر صورتیه یعنی یا تحویلاتنك بر قسمنك بدانی تأدییه ده، یا خود اولنرك فائض ورأس المال مراتب سنویه سنی تأمین ایچون بر سرمایه شکنده استعمال ایله یه جکدر . دیگر طرفدن ده سنوی لا اقل ۲,۱۹۰,۰۰۰ فرانقدن عبارت بررات آلهرق بونی ده قسماً تحویلاتنك، قسماً ده حصه سنداتنك فائض ورأس المالنه تخصیص ایده جکدر . هر حاله حاصلاتی ترایده بولونان بر شمدوفر ك حکومت طرفدن اشتراسی بالخاصه حاصلاتك فی اشترا ایچون تعیین اولونان حداصغری بی تجاوز ایتمه کی باشلادیفی سنه لرده قومپایه ایچون ارزو اولونه جق برشی دکلدر .

* *

شمدوفر قومپایه سنك منافع مستقبله سی نه دن عبارت اولدیغی کوردك فقط ینه تکرار ایدرم که تقلیاتك قسم اعظمی دائماً احوال طبیعه نك تحت تأثیرنده بولنه جق اولان بر خط حقنده قطعی وریاضی بر نتیجه اراء و اظهار ایتك قابل دکلدر . مع مافیه هر حاله بحث ایتدیکمز احتمالك بر احتمال قوی اولدیغنه اون یدی سنه لك تجاربی اشهاد ایده بیلیرز . فی الحقیقه شمدوفر دن محروم اولان بر مملکته شمدوفر یا بیلماسنی متعاقباً کچه جك سنه لرك تقلیاتنده وقوع بوله جق نسبت تراید شمدوفر انشا اولونوب تأثیرات

اصلیه سی اجرا ایتدکدن صوکرآ حلول ایدہ جک اولان سنہ لک نسبت
ترایندن فضلہ اوناسی و بناء علیہ استقبالا ترقیاتک دہا دون برنسبتہ
وقوعہ استطار ایدیلہ سی لازم کلہ جکی وارد خاطر اولورسہدہ بوقاعدہ
جریان حیاتلری صورت طبعیہ دہ اولان مملکتلرہ شامل اولاییلر .
اودہ ہر زمان دکل . بزم کبی ماضیلرلہ حاللری واستقباللری آراسندہ
عظیم برفرق موجود اولان مملکتلرک امیدلری دہا زیادہ اولمای برخیال
کبی تلقی اولونمالیدر .

*.

قومپانیہ بوسنہ دن اعتباراً کندی یاغیلہ قاورولہ جق بر حالہ بولنہ جقبہ
حکومت اولا سلا نیک ، مناسر سنج قلری اعشارینہ صاحب اولہ جقدر .
ذاتاً بویکی سنجاق اعشاری حتی شمندو فرک بدایت انشاسندن بری
ہیج برسنہ تماماً تأمینانہ کیتہ یوب ہر سنہ وسطی اولہرق ۸۰،۷۰ بیک لیرا
آرتمش و حکومتہ تسلیم اولمشدر . بعد ما عموم حاصلات حکومتہ عائد اولہ جقدر
و حکومت دہ بونی طبعی بودجہ سنک واردات قسمنہ کچیرہ جقدر . حکومتک
استفادہ سی بوندن عبارت قالمایوب ۱۴۳۰۰ فرانقدن فضلہ اولہ جق
حاصلات غیر صافیہ نک ربی دہ کندینہ عائد اولہ جقدر . ایستہ حکومت
بومنفعتی برمدت ایچون فدا ایدرک ، قومپانیہ دہ عینی فداکارلغہ قاتلانہرق
اھالی زراعیہ یی نمون ایتمک اوزرہ تعرفہ لردہ بعض تنزیلات محقہ اجرا
اولونمالیدر . حکومتک تأمینات ایچہ سی اعطاسنہ مجبور اولدینی سنہ لردہ
تعرفہ لری تنزیل ایلمہ سی — منزل تعرفہ لر مطلقاً بایکی سنہ نقصان حاصلاتی
ایجاب ایدہ جکندن — بودجہ یہ یکی بر بار تحمیل دیمک اولہ جقندن قولای
قولای تجویز ایدیلہ من و ایدیلہ ملیدر : مکرکہ یک فاحش تعرفہ لر بونی مطابقاً
استزام ایلمہ سین ! فقط حکومت تأمینات ایچہ سی ویرمہ نیجہ ، قومپانیہ دہ

حاصلاتنده و قیله تأمینات ایله املا ایدیلن بوشلغک شیمدی کندی کندینه
دولدیغنی و بونی تجاوز ایتدیکنی کورنجه - بوفضله منفعته استحقاقی انکار
ایدیله مکله برابر - ینه موقت برمدت ایچون بوتنزیلاتی تنسیب ایله ملیدر .
نائیاً یکر منجی عصرده «۲۰۰» کیلومترواک برمسافه نك سکر ساعتدن
اول قطع ایدیلهمه مسی بویوک بک بویوک برنقصاندر . اکر سرعت تزید
ایدیله بک اولسه و باخصوص یازین خط بوینده عزیزیت و عودت سیاحتلری
یا بئلیق امکائی موجود بولونسه، معین کونلرده تنزه قطارلری ترتیب ایدیلسه
اهالینک رغبتی آرتجه جتنده و بو اصلاحات ایشله تمه مصرفی برمدت ایچون
آرتیر برسه ده صکره فضله سیله اعاده ایده جکنده شبهه یوقدر .

ثالثاً . - خطک کذرکاهنک یا بالاختیار یا خود خلقک جهالتی حسدیله
فنا تعین ایدیلش اولسی مثلاً اغستوس کبی زنکین ، صنعتکار ، زارع
برقصه ده تقلیات و یوجیلینی اشکال ایله مکده در . بو خطای انشائی بی شیمدی
تعمیر ایتک امکائی . وجود ایسه توسل ایتیلی ، دکل ایسه مثلاً برشعبه
یا پیله رق قسماً تلاغیسنه چالیشیلیدر .

محمد مبارک

۲۹ کانون نائی، ۳۲۴